

FRAMKVÆMDARÁKVÖRÐUN FRAMKVÆMDASTJÓRNARINNAR

2015/EES/74/82

frá 11. apríl 2014

um að tilnefna skráningarstofu fyrir .eu höfuðlénið

(2014/207/ESB) (*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (EB) nr. 733/2002 frá 22. apríl 2002 um að taka í notkun .eu höfuðlénið⁽¹⁾, einkum 1. mgr. 3. gr.,

og að teknu tilliti til eftirfarandi:

- 1) Framkvæmdastjórnin ætti að tilnefna skráningarstofuna sem falið er skipulag, stjórnarsýsla og stjórnun á .eu höfuðléninu, eftir birtingu á auglýsingu eftir áhugasömum aðilum í *Stjórnartíðindum Evrópusambandsins*.
- 2) Með ákvörðun sinni 2003/375/EB⁽²⁾ árið 2003 tilnefndi framkvæmdastjórnin Evrópska skráningarstofu Netléna (e. *European Registry for internet Domains (EURid)*) sem skráningarstofu fyrir .eu höfuðlénið. Framkvæmdastjórnin gerði samning við Evrópska skráningarstofu Netléna þar sem tilgreint er með hvaða skilyrðum framkvæmdastjórnin hefur eftirlit með skráningarstofunni sem sér um skipulag, stjórnarsýslu og stjórnun á .eu höfuðléninu. Samningurinn var undirritaður 12. október 2004 til fimm ára og var síðan endurnýjaður 2009 í fimm ár til viðbótar. Hann fellur úr gildi 12. október 2014.
- 3) Framkvæmdastjórnin auglýsti eftir áhugasömum aðilum (2013/C 134/06) í *Stjórnartíðindum Evrópusambandsins* 14. maí 2013 um leið og birt var yfirlýsing framkvæmdastjórnarinnar um hlutverk hennar sem eftirlitsaðili skráningarstofunnar sem sér um skipulag, stjórnarsýslu og stjórnun á .eu höfuðléninu (2013/C 134/05) og hvatti til umsókna frá stofnunum og fyrirtækjum sem óskuðu eftir því að verða valin sem skráningarstofa sem falið er skipulag, stjórnun og stjórnarsýsla á .eu höfuðléninu.
- 4) Fresturinn sem tilgreindur var í auglýsingunni var til 20. júní 2013. Aðeins ein umsókn barst, frá Evrópskri skráningarstofu Netléna.
- 5) Mat sem byggðist á þeim hæfisviðmiðunum og valmiðunum sem kveðið var á um í auglýsingunni eftir áhugasömum aðilum fór fram 25. júlí 2013.
- 6) Matsaðilar skoðuðu umsóknina og settu fram stigagjöf sem samanstóð af mismunandi einkunum (einstökum og sameiginlegum) fyrir umsóknina í samræmi við einkunnakerfið sem mælt er fyrir um í 4. lið auglýsingarinnar, og með tilliti til heildargæða með valviðmiðanirnar í huga. Matsaðilarnir komust að þeirri niðurstöðu að umsóknin frá Evrópskri skráningarstofu Netléna uppfyllti lágmarkskröfur allra valviðmiðana. Framkvæmdastjórnin hefur skoðað niðurstöðu matsaðilanna og undirritar ákvörðunina á þeim grundvelli.
- 7) Ráðstafanirnar, sem kveðið er á um í þessari ákvörðun, eru í samræmi við álit fjarskiptanefndarinnar sem komið var á fót skv. 1. mgr. 22. gr. tilskipunar Evrópuþingsins og ráðsins 2002/21/EB⁽³⁾.

(*) Þessi EB-gerð birtist í Stjtið. ESB L 109, 12.4.2014, bls. 41. Hennar var getið í ákvörðun sameiginlegu EES-nefndarinnar nr. 282/2014 frá 12. desember 2014 um breytingu á XI. viðauka (Rafræn fjarskipti, hljóð- og myndmiðlun og upplýsingasamfélagið) við EES-samninginn, sjá *EES-viðbætur við Stjórnartíðindi Evrópusambandsins* nr. 71, 26.11.2015, bls. 33.

⁽¹⁾ Stjtið. EB L 113, 30.4.2002, bls. 1.

⁽²⁾ Ákvörðun framkvæmdastjórnarinnar 2003/375/EB frá 21. maí 2003 um að tilnefna skráningarstofu fyrir .eu höfuðlénið (Stjtið. EB L 128, 24.5.2003, bls. 29).

⁽³⁾ Tilskipun Evrópuþingsins og ráðsins 2002/21/EB frá 7. mars 2002 um sameiginlegan regluramma um rafræn fjarskiptanet og -þjónustu (Stjtið. EB L 108, 24.4.2002, bls. 33).

SAMÞYKKT ÁKVÖRÐUN ÞESSA:

1. gr.

Evrópsk skráningarstofa Netléna (e. *European Registry for internet Domains (EURid)*) skal vera skráningarstofa fyrir .eu höfuðlénið og er falið skipulag, stjórnsýsla og stjórnun á .eu höfuðléninu.

2. gr.

Framkvæmdastjórnin skal gera samning við Evrópska skráningarstofu Netléna þar sem tilgreint er með hvaða skilyrðum framkvæmdastjórnin hefur eftirlit með skráningarstofunni sem sér um skipulag, stjórnsýslu og stjórnun á .eu höfuðléninu, í samræmi við c-lið 1. mgr. 3. gr. reglugerðar (EB) nr. 733/2002.

Samningurinn skal í upphafi gilda í fimm ár og heimilt er að framlengja hann tvisvar, í hvort skipti um fimm ár að hámarki.

3. gr.

Ákvörðun 2003/375/EB er felld úr gildi.

4. gr.

Ákvörðun þessi öðlast gildi daginn eftir að hún birtist í *Stjórnartíðindum Evrópusambandsins*.

Gjört í Brussel 11. apríl 2014.

Fyrir hönd framkvæmdastjórnarinnar,

forseti.

José Manuel BARROSO
